

Forfatter: Blicher, Steen Steensen

Titel: Udrag fra E Bindstouw (DK) (paralleltekst med Rigsmålgengivelse)

Citation: Blicher, Steen Steensen: "Noveller", i Blicher, Steen Steensen: *Noveller*, udg. af Esther Kielberg ; Henrik Ljungberg , Det Danske Sprog- og Litteraturselskab, Borgen, 1991, s. 256. Onlineudgave fra Arkiv for Dansk Litteratur: <https://tekster.kb.dk/catalog/adl-texts-blic03val-shoot-idm140515387302928/facsimile.pdf> (tilgået 24. april 2024)

Anvendt udgave: Noveller

Degaang vi saa kam te Hamborre igjen, saa vil vi et længer væ ve Fransmannen. Da vi saa Faawal te ham, da græd Prins Ekmøll som et Baan, faa han vil et haa wor aa mæ wos. «Faawal!» sø vi. «Adi!» sø di, «adi!» Ræv aa Har!» «Kys wos hial!» sø vi. Saa begynt di igjen mæ dje Pivsnak. «Ja piiv I no i wo . . .» sø vi, aa saa rej vi te Baanhøwd. Die kam Kosakkeren om wos. Di vil prik ætte wos mæ dje Pigkjepper. Den føest, A soe, tint A war en Kræmer; men da han kam næter, ku A wai sie te de sku væ en Krigskaal. «Do er en sue Kaal te aa ri!» sø A te ham: «A trower missin Do sidder oweno di Madpues.» «Dowre!» sø han. «Ve Do ha Dowr?» sø A, «ja dessom Løgtmanten soe, hudden Do sedder mæ diin Knæter, saa vil han nok gi Dæ Dowr; ka hænsæ Do fik Tewand aasse.» Men saa stak han mæ i mi hower Laar. «Do æ sue nære!» sø A, aa saa hog A hans Kjøp mit øwer, aa ham sjæl bag etter. «Do ku ha woer fræ mæ!» sø A. Die war aasse en fransk Genneraal faale mæ wos. Di kalt ham Lallemand. De war en Wowhals. Han haad en bette rø Lue po, den swinged han aalti mæj, aa saa rowt han lissaa høwt som han kunn: «Brave Danno! A æ laang! A æ laang!» men de war ett sann, faa han wa kun en bette stumpet Kaal; men modde wa han.

Sien drøw vi te en Bøj, di kalt Sestej; die wa saa manne Finner, te den jeri ku et spøt faa den aan; men vi ragt dem indda tesii, aa kam walholten in te Rensborre. Po Vejen kam der en Fransmand rennen, aa sprang op po Højsten bag ve mæ: «Væk Per Mission!» sø han. «A hedder ett Pejri, A hedder Jens,» sø A, «sik heller vil A go væk for Dæ; men ve Do væ skekkele, saa mo Do ri mæj.» Saa vil han har Akkevit. «Ve do ha Brænviin?» sø A, «de ka Do fo» aa saa ga A ham ow mi Flask. Da han had drokker, begynt han aasse aa snak om mi loring Piivrør. «Hwissomment! Do ett holler Flav» sø A, «saa skal A kyll Dæ nier ow Højsten.» Men saa ba han om en mild Pardon, aa siin bløw han rolle.

De wa de siist Slaw, A war i; aa degaang A sku te aa sedd ow Højsten, haad A mæst mi Maandbed te mi Piiv, aa A haar aalle sit et siin.»